

Sabor Cultural di autor, canta-autor y poetanan local

DIABIerna y diasabra proximo, dia 2 y 3 di Mei, un grupo di amante di idioma y wega di palabra ta uni den *Miramar* na *De Palm Island* pa ofrece nos pueblo un presentacion rico y multifacetico di nos lenga materno y caribense, combina cu contamento di cuenta. Sr. Nico Connor, kende a demonstra di ta masha agil den acompaña poetanan riba tononan magico di su steelpan durante declamacion den varios cuentronan literario, lo ta presente pa sigura cu henter e presentacion ta un berdadero celebracion di Sabor di Cultura (Taste of Culture) di Aruba, cual Taste of Belgium ta organisa pa celebra nan prome lustro na nos isla. New India Assurance Company a join e celebracion como Sponsor Principal di Sabor di Cultura ya cu e encuentro ta pas netamente cu the art of being smart™, e cultura cu e empresa ta desaroya y aplica

tanto paden como pafo di e compañía pa por ta un entidad di aporte integro y berdadero na desaroyo general den nos comunidad. Segun palabranan di Sra. Joy Raghunath, Directora di e empresa di seguro cu ya tin 45 aña ta duna servicio confiablel na nos comunidad; “Nos artistanan ta e Alma Creativo di Aruba. Nan ta confronta nos cu e rikesa infinito na potencialidad creativo cu ta biba den nos comunidad. Nan ta siña nos biba bida den multiple color y dimensionnan cu den bida cotidiano ta keda scondi pero cual e artista sí ta capas di capta y trece na nos alcanse den hopi diferente forma. Mi ta confia cu e evento lo ta un exito y lo por ta un bon idea pa laga esaki tuma luga anualmente como un estimulo mas na nos dushi cultura y artistanan Arubiano.” Presentadornan pa loke ta trata e seccion di idioma y musica di e dos anochinan di Sabor di

Cultura na Palm Island ta: Caresse Isings, poeta y narrador. *Sr. Ramon Todd Dandaré*, kende ta comparti detayenan intimo di nos succulento idioma Papiamentu cu nos na su manera original di entretene mientras cu e ta informa. *Sr. Luciano Milliard*, conoci na Aruba y Antiyas como gran orador y kende pa e anochi aki lo representa San Nicolas como e aspecto tin biaha negligisha mientras San Nicolas y nos Ingles Caribense ta parti integro y di gran influencia cultural den nos comunidad di Aruba. *Sra. Olga Buckley Zaandam*, autor reconosi, tremendo poeta y e iniciador y motor tras di *Bonochi Drumí Dushi*; un proyecto noble caminda voluntarionan ta pasa cas pa cas pa conta nos muchanan un storia prome cu nan bai drumi. Tambe lo declama for di su mes un colleccion pendiente pa publicacion e aña aki, *Srta. Nia van Nie*, un hoben poeta-escritora



Caresse Isings, Nico Connor, Olga Buckley Zaandam, Luciano Milliard, Luz Rosario di New India, Ramon Todd Dandaré.

sumamente prometedor cu ta demonstra cu simia di amor pa literatura planta den curason di nos yiunan sin duda ta ramifica y forece te ofrece un rikesa abundante na fruta encantador. Pa sera e anochi cu un toke incompara-blemente criyoyo, e tan stima canta-autor *Sr. Etty Toppenberg* lo entretene publico presente cu su temanan tipico di nos isla na su manera totalmente unico. Aruba a produci un artista so den e gremio di canta-autor cu Sr. Toppenberg

ta representa, su palabranan ta poesia canta cu por ponebo hari of yora y su habilidad amplio pa improvisa seguramente ta e manera mas apropiada pa por clausura celebracion di idioma y musica netamente Arubiano den Sabor di Cultura.

PUBLICO en general ta bon bini na *Sabor di Cultura*, diabierna dia 2 y diasabra dia 3 di Mei '08. E presentacion di Idioma y musica den Miramar ta di 9'or te 11'or riba tur dos anochi.